

Молитва о болящих

Владыко, Вседержителю, Святыи царю, наказуяи и не умерщвляяи, утверждаяи низпадающия и возводяи низверженныя, телесныя человеков скорби исправляяи, молимся Тебе, Боже наш, раба Твоего (имя) немощствующа посети милостию Твоею, прости ему всякое согрешение вольное и невольное. Ей, Господи, врачебную Твою силу с небесе низпосли, прикоснися телеси, угаси огневицу, укроти страсть и всякую немощь таящуюся, буди врач раба Твоего (имя), воздвигни его от одра болезненнаго и от ложа озлобления цела и всесовершенна, даруй его Церкви Твоей благоугождающа и творяща волю Твою. Твое бо есть, еже миловати и спасати ны, Боже наш, и Тебе славу возсылаем, Отцу и Сыну и Святому Духу, ныне и присно, и во веки веков. Аминь.

Когда получишь исцеление от какой бы то ни было болезни, воздай благодарение Господу.

Молитва благодарственная, святого Иоанна Кронштадского

Слава Тебе, Господи Иисусе Христе, Сыне Единородный Безначальнаго Отца, едине исцеляяи всяк недуг и всяку язю в людех, яко помиловал мя еси грешнаго и избавил еси мя от болезни моей, не попустив ей развиться и умертвить меня по грехам моим. Даруй мне отныне, Владыко, силу твердо творить волю Твою во спасение души моей окаянной и во славу Твою со Безначальным Твоим Отцем и Единосущным Твоим Духом, ныне и присно, и во веки веков. Аминь.

Молитва о том, чтобы ухаживать с любовью за болящими

Господи Иисусе Христе, Сыне Бога Живаго, Агнче Божий, взявляяи грехи мира, Пастырю добрый, положивый душу Твою за овцы Твоя, Небесный Врачу душ и телес наших, исцеляяи всякий недуг и всякую язву в людех Твоих! Тебе припадаю, помози мне, недостойному рабу Твоему. Призри, Многомилостиве, на делание и служение мое, даждь ми бытии верным в мале: послужити болящим, Тебе ради, носити немощи немощных, и не себе, но Тебе Единому угодити во вся дни живота моего. Ты бо рекл еси, о Сладчайший Иисусе: понеже сотвористе единому от сих братьий Моих меньших, Мне сотвористе. Ей, Господи, суди мне, грешному, по сему глаголу Твоему, яко да сподоблюся творити благу Твою волю во отраду и утешение искушаемых, недугующих раб Твоих, ихже искупил еси честною Твоею Кровию. Ты бо еси Источник исцелений душевных же и телесных, Христе Боже наш, и Тебе, яко Спасителю человеков и Жениху душ, грядущему в полунощи, славу и благодарение и поклонение возсылаем, ныне и присно, и во веки веков. Аминь.